



FM 2015/124

Justus Hansen

15. maj 2015

Aatsitassarsioqatigiit aatsitassanik misissuiniarneranni aammalu misissuinerit suli ingerlagallarneranni innuttaasunik oqimaaqatigiisumik paasisutissiisoqartarnissaa siunertaralugu, apeqquteqaat tunngavigalugu Inatsisartut oqallinnissaannik siunnersuut.
(Inatsisartunut ilaasortaq Kalistat Lund, Inuit Ataqatigiit)

Kikkut tamarmik paasisimassagunarpaat Inuit Ataqatigiit aatsitassarsiornermi pisut suugaluartunulluunniit akerliusut. Partiip sukkulluunniit isornartorsiuisarput. Soorunami Inuit Ataqatigiit taamaaliukuttoorsinnaapput, partiilli paasisinnaasariaqarpaat sakkortusaartuarnini aningaasaleerusussinnaasunik tatamitsitsisinnaasoq taamaattoqassappallu siunissami nunatta aningaasarsiorinissaa annertuumik innarlerneqarsinnaavoq.

Uani siunnersuummi Inuit Ataqatigiit toqqaannartumik allapput, aatsitassarsiorlut nunarsuup ilaani sumiiffinni peqquserluttuusut unneqqaserluttuullutillu. Partii aamma isumaqarpoq, kusanaatsuusoq aatsitassarsiorlut najukkami arsaattartoqatigiinnut assigisaannulluunniit aningaasaliisassappata. Allaanngilaq Inuit Ataqatigiit isumaqartut, aatsitassarsiorlut aalajangersimasunik malittarisassaqartinneqasassut suliffeqarfiillu allat allanik. Tamanna demokraatiskiunngilaq. Tamatuma sanitigut Inuit Ataqatigiit aamma isumaqarput aatsitassarsiorffiit aqqissuussaannik innuttaasut ataatsimiisinneqassappata arlaannaannulluunnii attuumassuteqangitsoq ataatsimiinnerni aquttuusassasoq. Tassanilu Demokratini tikkuartariaqarparput, aatsitassarsiorfiit pisinnaatitaaffeqarmata ataatsimiititsissallutik nammineq isumartik naapertorlugu. Taamaasillutik Inuit Ataqatigiit nunami demokratiskiusumik ingerlatsiffiusup killissarpiaani inissisimaniarsaripput.

Inuit Ataqatigiit paasisariaqarpaat Namminersorlutik Oqartussat aqqissuussaannik qilersorsimannngitsumik aatsitassarsiorinissaq pillugu paasititsiniaajumalluni inuiaqatigiit ataatsimiisinerat kiisalu aatsitassarsiorfiit innuttaasunik ataatsimiititsinera assigiinngimmata. Soorunami aatsitassarsiorfiit innuttaasunik ataatsimiititsinermi soqutigisatik eqqartussavaat.



Aamma Inuit Ataqatigiit innuttaasunik Ataatsimiititsingaangamik Inuit Ataqatigiit isumaat nittarsaattarpaat. Allatummi periuseqassagunik aamma eqqumiippallaaluatsiassaaq.

Demokraatini upperaarput innuttaasut namminneq tamakkiisumik isornartorsiuisinnaasut. Qularinngilluinnarparput innuttaasut nalilersinnaagaat, innuttaasunik ataatsimiititsineq aaqqissuisup isumaanik imaqangaatsiartussaasoq.

Tamatuma saniatigut aamma upperilluinnarparput, suliniut sunaagaluartorluunniit pillugu Namminersorlutik Oqartussat innuttaasunik ataatsimiititsineranni iluaqutissat akorngutillu assigiimmik oqaatiginiarneqartassasut.

Taakkuungallarput Demokraatini oqaatigerusutagut.